

*Hannes Beeghenbint Satarar:*

## **Gasànkh übar-n Langhez**

Ais un snèa vorsbìntanten  
d èerda rüstat-sich grüün,  
nakhont-ròote pöömelen  
khèarnt börfan loop un plüün.

Trüübe vallanten nèt mèar  
snee-bazzardar von steeln;  
bia voar, in liichte rëndelen  
in-z mear khèarnt gheen de beeln.

Az hia de dinkh saint heveghe,  
z jaar zòogan-ta üz makh  
von mòrgande af abande,  
ba loofan tüüt dar takh.

De zait in minschen manaden,  
se machet nòch iar khèar;  
dar mann, am-bòtta stirbat-ar,  
bar segan-en nemmèar.

Beeldar mann, dar sterchorste,  
üz sicharn möcht an stunt,  
un az nèt zölle Lachesi,  
baz Atrop hat gaspùnt ?

Billa, gròoza billekhot,  
leeban asò unbaròat:  
gatrótt af zait unsichara  
untar an sicharn tòat !

Seelga zait, ba tröömat-sich,  
is ditzan leeban üz,  
imm ooghe-plikhe vludarnten  
bia vom-me glitz an grüüz.

Heevikh-schööne hümmale,  
ich säufte z aüch, mi khèar,  
bia in sain hòomant günnat-me  
vorloorandar romèar.

Bèar ghit miar müüdem vèttinghen  
zo vludarn auf sò hòoch ?  
Und maindar seeln un m aatome  
khraft und macht ghit òch ?

Z pluut in-z hèertze standa-mar,  
oh trüüba bèlt-galüst !  
Z ist nuar zait, daz plüüntaten  
sichore rèete in pruust.